



## partii naleraq

25. februar 2016

UPA 2016/131

Inatsisartut suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

**Nunatsinni sulisinnaasut tamarmik atorneqalernissaat anguniarlugu, minnerunngitsumillu kalaallinik atorfilinnik qaffakkiartortitsinissamik anguniaqartumik, atorfilinnik pikkorissaasanerup kalaallinut iluaqutaanerusumik aaqqissuunneqarnissaanik oqallinnissamik siunnersuut.**

(Inatsisartunut ilaasortaq Hans Enoksen, Partii Naleraq)

### **Tunngavilersuut:**

Ukiorpasuit suli massakkumut ingerlapput tikisitanik sulisoqarluta, sulilu sulisoqartuarnissarput ukiorpassuarni ingerlassaq naatsorsuutigisariaqarparput, tassami ilinniarsimassutsikkut suli killeqarpallaartumik inissisimanerput pissutaavoq, tamannalu uniffigiinnarsinnaajunnaarparput, kalaallit pisinnaasut qaffasinnerunik suliffinnik tigoraanissaat pikkorissaanikkut nukittorsartariaqalerparput aallartillugulu.

Namminersornerulernermit Namminersornermut ikaarsarpugut, akisussaaffipput annertusivoq sorpassuartigut Politikkikkut aalajangersaasinnaangorluta, taamaakkaluartoq ukiuni Namminersornerulernermit massakkut kalaallinik sulisunik annerusumik atuinisaaq nukittorsarsimangilarput, tassami takusinnaavarput suli tikittakkagut suli amerlavallaarujussuartut, tamannalu takusinnaagaluarlugu amerlasuunik suli tikerartitsivugut, uffalu ilarpasui kalaallinik inuttalersorneqarsinnaagaluartut, massakkumut suli kalaallit atorneqarnerulernissaannik nukittuumik inissimangilagut tamannalu allangortitariaqalerparput.

Siunissami ilinniartitaanikkut aningaasarsiornikkullu nukittunersumik inissisimalissagutta aningaasat pikkorissaanernut ilinniartitaanernullu atortakkagut amerlanerpaat kalaallit sulisut qaffakkiartornissaannut atorneqarnerulernissaat aalajangersaaffigisariaqalerparput.

Tassami ilumoorsinnaangilaq pikkorissuninngooq tikisitanik sulisortaariarluta, tikittullu pikkorissalinnguarutsigit, uffa saniani kalaaleq nunami suliuartusaaq pikkorissarusukkaluartoq

itigartittuarlugu, taavalu pikkorissakkagut amerlasuut kalaallit inuiaat akiligaannik pikkorissariarlutik allagartatik qaffassariarlugit

naamassillutillu nunaminnut utertarput, taavalu aamma allanik tikisitanik taarserutsigit, aamma taamatut aallaqqataaniit allartilluta pikkorissarteriarlugit aamma taakku nunaminnut utertarput taamaaliortuarnerlu tassa ingerlaannarsinnaanngitsoq oqartariaqalerpugut.

Taamaattumik kalaallit pikkorissarlugit immikkorluinnaq aningaasaliilluta aallartittariaqalerpugut, kalaalerpasuit qaffasinersumik atorfeqarsinnaagaluartut massakkut atorneqanngillat, tamannalu Politikkikkut akuerinnarsinnaajunnaartariaqarparput.

Tikisitatta aamma pisussaaffigaat nunaqavissunik sulisoqarnikkut qaffasaanissaq tassami tikisippagut maanga suliaartortillugit, imaanngitsoq naalakkatut inissisimajuassasut, kalaallit pisinnaasut amerliartuinnarput taakkununga nukigut sulinikkut qaffassarneqarnissaannut atornerusariaqalerpagut aatsaat taamaliornikkut nuna namminersortoq qanilliaratorneqarsinnaammat.

### **Inatsisartut oqaaseqaatissaattut siunnersuut.**

Nunatsinni sulisinnaasut aammalu ilinniarsimasut kalaallit tamarmik atorneqalernissaat anguniarlugu kalaallinik atorfilinnik qaffakkiartortitsinissamik anguniaqartumik aammalu kalaallinut pikkorissaanerit annertusaqqullugit Inatsisartut Naalakkersuisut kammattorpaat suliat pikkorissaanermut tunngasut nunaqavissunut piaartumik sulissutigalugit aallarteqqullugit.